

編號 1 號

【幸福个味緒】黃美貞原作

老古人言：「食了五月粽，被骨正上棟。」五月節正過忒，當晝開始天時就熱到佇毋著，該時堵好係梅雨季節，落過水、起風咧，將就摻冷氣關忒，行到窗門脣感受熱天難得个涼風。除忒幸運看著天邊靚靚个七彩虹，還鼻得著馬膠路¹分日頭煎過、分雨水打過以後淡淡、香香个味道，臨暗頭窗門外背一陣一陣「挞挞挞——挞挞挞——」个蟬仔聲跔等清風傳落屋肚來。

佢想起還細時節，熱燠燠个下晝頭，佢這兜姊妹會摻隔壁鄰舍个細人仔伴共下搞，長下搞到斷烏，聽著阿姆開聲喊：「好轉來洗手食飯咧！」正盼得轉屋。

佢爸係客運司機，平常時愛輪班，所以總係暗晡頭八、九點正下班。當記得係堵好該日無伸麼个飯菜，佢爸會自家煮麵食。逐擺佢就先摻蒜頭礮礮仔剁到幼幼、滷一息豆油還過香油在碗公肚，續等摻煮好个麵撈起來，水泌燥倒在碗公肚，摻蒜頭、配頭共下攪分佢勻，該兩時係聽著佢爸問：「有麼人愛食麵無？」佢這兜就當暢，遽遽飄落灶下，你一口、佢一口，又賺著一餐香噴

噴个宵夜，食到飽飽仔，還幸福哪！佢爸摻个飯菜間等伸無幾多條个麵，儘採划落肚，就恁樣過一餐。

又還記得，熱天臨暗仔洗好身腳，等到食飽夜撿拏好、寫好作業、看一下電視，細人仔還細又好搞，差毋多到愛上眠床該下，又一身汗咧。頭擺屋下無恁好額，斯有一隻間房安有冷氣定定。阿姆會在睡目前半點鐘摻冷氣擰開來，等到大家愛睡該下，間房門打啊開來，斯有涼沁沁个冷氣吹來，歸屋人一下仔就睡落覺咧。

這幸福个滋味一直囡在佢个心肝肚，毋多知仔成人長大、做人阿姆以後，正知「賺錢可比針挑筊，使錢可比水推沙。」乜正體會爺哀頭擺辛苦畜大佢這兜細人仔，還過愛理一隻家哪有恁該？毋過該愛盡个責任摻義務，佢兜從來都毋識放忒過。

¹ 馬膠路：音 ma ga lu⁺；柏油路。

編號 2 號

【細日頭】胡明華原作

細日頭係阿生畜个鸚哥¹，兩片面頰卵有紅紅个圓箍仔，看起來就像細細个日頭，所以喊佢「細日頭」。佢个脰身白白，尾長長，頭那頂有一撮長長、黃黃梳到腦屎背个頭那毛，身形盡靚。

細日頭在鳥子時節就分阿生對店肚接到屋下，從佢歸身無毛軟頭扁摺²到翼胛毛生到亮亮齊齊，最親个就係阿生，見看著阿生，佢就歡喜靸天，暢到耐毋得，啾啾滾緊唱歌。佢長透企在阿生个拈食指³抑係肩頭頂高，不時俛兼來，用嘴輕輕仔啄阿生个面，啣出一細截舌嫵啞佢，成時還會啞到耳陀去，乜長下在佢脰身脰來迂去，實在生趣。有一擺，阿生翕一張細日頭啞佢个面个自拍相片，細日頭看啊著，嘎又再過啞加一到，屋下人笑到眨轉來。

細日頭个毛正生齊个時節，識飛走一擺。該日阿生毋知哪條腸仔毋直，攞等鳥籠仔去公園，學人放鳥仔，妄想細日頭飛出去做得嘍佢再過飛轉來，又合想愛展風神。無想著鳥籠仔正打啊開

來，細日頭翼皺皺仔，黏時就飛到十二樓恁高，跔等就無影無跡咧。阿生心焦馬亂⁴，仰會尋去尋轉都尋無？佢歸暗晡睡毋落覺，天旨光就緊拚拚仔再過去公園尋。佢有聲喊到無聲，嘴又燥肚又渴。好得皇天不負苦心人，包尾分環保人員在一頭樹頂尋著，一人一鳥正又過相逢。

前一駁仔，阿生試著細日頭大咧，就無細心照顧，斯顧自家个事，陪佢个時間緊來緊少。麼人知細日頭嘎開始觜自家个毛，到有一日，兩片翼胛下總下擲到淨淨，就像人發病仔頭那般毛光頂樣，這時阿生正緊張起來，遽遽送去鳥仔醫院。衰過正得啊！藥錢比人看病還較貴！

人講「戇戇戇，豬肉煮米醬；精精精，無屋好居身。」阿生原旦還話著自家一等精，省忒陪細日頭个時間就賺著時間趕事，毋會仰般，結果害了細日頭，乜害著自家，正經係假精無錢賺。

這擺阿生學乖咧，開始認真照顧細日頭，還分佢戴伊麗莎白頸圈，避免佢又過咬翼胛下；乜知得原來做鸚哥个主人愛用心照顧好勢；不管佢到底係快樂抑係悲傷？係發悶也係緊張？係肚屎枵抑係嘴渴？甚至，佢係毋係慍悴？都愛耐心做伴，恁樣正會人鳥兩相安哪！

¹ 鸚哥：音 en`go`；鸚鵡。

² 軟頭扁摺：音 ngion`teu bien`zhab；此處指初生時長得醜醜的、皮膚皺皺的樣子。

³ 拈食指：音 ngiam`shid`zhi`；食指。

⁴ 心焦馬亂：音 sim`ziau`ma`lon+；心中慌亂無主。